

REGIONAL NEWS BULLETIN

HEADLINES (EVENING)

Date – 17/12/2024

Time - 18:30 -18:40Hrs

- Chief Minister Pu Lalduhoma hovin Mizoram State Project Monitoring Committee te report sawiho a ni.
- Tlaizawng leh Khawpuitan Hapta chu vawiin khan Chawngtlai khuaah hman tan a ni.
- Mizoram PWD chuan tun dinhmunah kawngpui thar, a vai a belhkhawmin kilometre 845.18 sial mek a nih thu an tarlang.
- Vawiin khan Lok Sabha-ah ram chhunga inthlan lian a ruala buatsaihna tur One Nation One Election Bill chu chhawpchuah a ni.

<><><>

CM

Vawiin khan Chief Minister Pu Lalduhoma hovin Mizoram State Project Monitoring Committee te chu CM Conference Hall ah an thukhawm a.

Lengpui Airport hna thawh mek an umzuina report te, Tlawng lei dawh mek an umzuina report te an ngaithla a. Tlawng lei nawr kai an tumnaa an khai chhinna hrui chah chhan kha Pulley vir thei lo vanga a hrui inbat chat ta niin an sawi a. Fimkhur lehzuala hna an chhonzawm leh tur thu an lo sawi a, an hmanruate an la khawm leh phawt ang a, nakum January hapta hnihnaa an thawh chhonzawm theih an inbeisei a. Kawng erawh chu engtiklai pawha kal tlang theiha siam a ni.

Heng bakah hian sawrkarin hmasawanna hna a thawhna tur hmun ram pass neih fel hmasak a tul thute, hna thawh zawh a nih hnua a enkawlana lam kalpui dan (SOP) neih a tulzia te an sawi a. Works department ni lovin civil construction works lian an khawihna hmuna harsatna awm chungchang te, contractor hun pawh seisak chungchang te leh Project Monitoring Committee hmalakna a lo chak zawk theih nana rawtna dangte an sawi bawh.

Meetingah hian Pu R. Lalrinawma, IRS (rtd), Vice Chairman, Er. Lalthanzuala Ralte, Member Secretary leh member dang te an tel a ni.

<><><>

ACB

Anti Corruption Bureau din tirh atanga vawiin thlengin eiruk thubuaia court in thiam loh a chan tir case 32 a awm tawh.

ACB hotuten Akashvani Corresponent an hrilh danin, kumin 2024 chhungin eiruk thubuai-ah FIR 17 an dawng a, kumin chhunga case chinfel zat chu 14 a ni tawh a, case chhui mek 12 a awm bawh a ni. Kan corr report lo ngaithla ang:

Anti Corruption Bureau hotute sawi danin, kumin chhungin eiruk thubuaia court in thiam loh a chantir case 4 a awm a, mipui sum hmanga hmasawanna hnathawh kawngah thil fel hlel a awm a ni tih hriate chuan an hnenah FIR an thehluh theih thu an sawi a, FIR thehluh duh tute zingah ziak leh chhiar thiam lo an awm a nih pawhin thawktuten an buaipui theih thu an sawi bawh.

<><><>

CHERRY BLOSSOM

Tlaizawng leh Khawpuitan Hapta chu vawiin khan Chawngtlai khuaah hman tan a ni a.

Eco-Tourism week tia vuah hi Zo Hill Station, Khawpuitanah hawn a ni a, Central KTP Leader kalchhuak Rev Dr Rosiamliana Tochwawng chuan he hun hi a hmanpui a ni.

Chawngtlai khua hian kum 2016 atang khan Tlaizawng Park hi bul lo tan tawhin, kumin hian a vawi khatna ni turin Tlaizawng hapta hi an buatsaih a ni.

Tlaizawng leh Khawpuitan Hapta ni 6 awh chu vawiin khan Chawngtlai khuaah hman tan a ni a, he hunah hian khualzin mite tana thlir nuam tur thil tam tak buatsaih a ni a, Adventure lam tui mite tan Mizo history a hmun pawimawh tak luahtu, Khawpuitan tlangdung feet 5600 chuang a sang, kilometre 5 dawna thuiah Trekking Route mumal tak siam a ni a, kham chhengchhe tak leh khambang tial mawi takah trekking tiin a chet tlat theih dawn a, Chawngtlai khua hian khualzin mite leh tlawhtute tan intihhlina Carnivals leh Stalls hrang hrang an siam bawk.

Chawngtlai hi kum 2014 khan Mizo Historical village a vuah niin Khawzawl District chhunga awm a ni a, Mizo Historical Village a nih angin Mizo Pipute sulhnu leh hmun hlui tam tak hmuh tur a awm a ni.

<><><>

PWD

Mizoram PWD chuan tun dinhmunah kawngpui thar, a vai a belhkhawmin kilometre 845.18 sial mek a nih thu an tarlang.

Mizoram PWD hotuten Akashvani News an hrilh danin tun dinhmunah Mizoram chhungah Sorkar laipui scheme leh a kaihnawih hrang hrangte atangin kawngpui thar sial hna thawh mek a ni a, PMGSY scheme hnuaiyah kawng 26, kilometer 410 a thui cheng vaibelchhe 530.85 man thawh mek a nih thu sawiin za a 86.26 zawh a nih tawh thu an sawi bawk.

Mizoram PWD hotute chuan NABARD loan hnuaiyah lamlian kilometre 234.22 a thui, cheng vaibelchhe 547.22 man sial mek a nih thu sawi bawkin, he hna hi za a 77.11 zawh a ni tawh a. PM-Devine hnuaiyah pawh Bamboo Link Road pahnih, kilometre 59 a thui siamna atan cheng vaibelchhe 100 hmuh a ni tawh bawk a, he hna hi za a 26.78 thawh zawh a ni tawh, an ti a. Central Road Fund hnuaiyah lamlian panga, kilometer 89.62 a thui siamna atan cheng vaibelchhe 302.33 an hmuh thu leh, he hna hi za a 78.32 zawh a nih tawh thu an sawi bawk.

Mizoram PWD chuan National Highway hi kilometer 590.29 a thui an enkawl mek a, hemi ah hian kilometer 79.20-a thui chei thatna atan cheng vaibelchhe 160 hmuh a ni a, hna hi za a 28 zawh tawh a ni a, State pawisa Plan Fund 5054 hnuaiyah kawngpui kilometer 580-a thui leh state pawisa tho 3054 (Mizoram road Fund) hnuaiyah kawngpui kilometer 371.92-a thui chei that mek a ni a, tun thal chung ngei a zawh hman tum a ni.

<><><>

MUNICIPAL CORPORATION

Vawiin khan Aizawl Municipal Corporation Board of Corporator chu Aizawl Mayor Pu Lalrinenga Sailo kaihhruaina hnuaiyah thutkhawm a ni.

He thutkhawmah hian Local Council thar pahnih, Bawngkawn West Local Council leh Tlangnuam West Local Council te indan na tura rawtna pawm a ni a, Aizawl khawpui chhunga lirthei dahna fel fai zawk neih a nih theihna tura ruahmanna, parking demarcation siam rem rawtna pawh pawm a ni bawk.

Vawiin thutkhawmah hian Pu Lalringliana, Executive Corporator, Cash & Account changtu chuan AMC Budget chungchang sawiin kum 2024 -2025 AMC sum ruahman zat ennawn cheng nuai sing khat sang khat za nga sawmruk panga a pharh chu Corporator thukawm te hian lungrual takin an pawm a, kum 2024-2025 AMC

sum ruahman zat ennawn hian suam a pangngai a ruahman sa chu cheng nuai sawmli paruk point pakua bial in a khum a ni
Vawiin vek khan Lunglei Municipal Council Board of Councillor Emergency Meeting neih a ni a, Chanmari, Venglai leh Electric Veng Local Council huam chhungah Krismas Bazar siam a rem ti.

LMC BoC December ni 3 a thukhawm chuan Lungleiah Krismas Bazar siam loh nise tiin a lo rel tawh a,hei hian sawisel a hlawh hle a ni. DEO complex a motor dahna zawng zawng chu thawmhnaw zawrh nan hman a niin stall sak sa chu Rs 6000 ten hralh a ni a, he pawisa hi DEO office a tawp tur nge Mizoram sum bawm a luttur tih erawh hriat a la ni lo.

LMC BoC meeting chusn mipui tam zawk huapzo leh that tlanna zawk tur nia an hriat avangin; hun tep ter tawh hle mahse heng Local Council pathum - Chanmari, Venglai leh Electric veng huam chhungah hian Local Council in an duh chuan Krismas Bazar an siam a remti leh hnuhnawh a, hmalak dan tur leh seat ruahman dan engkim an kutah a dah a ni

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puang a ni a. AIR News Aizawl Youtube Channel, All India Radio News Aizawl Facebook page leh newsonair.gov.in-ah te, chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PRE PUBLICITY

Akashvani Aizawl Regional News Unit buatsaih kum 75 chhunga India danpui chungchang sawihona chu naktuk dar 11 leh a chanve ah tihchhuah a ni dawn.

India Danpui Constitution chungchang sawihona ah hian Govt Mizoram Law College Principal Dr Esther Chhangte, ICAFI University Mizorama Political Science Asst Professor Dr Lalengkima leh Gauhati High Court Aizawl Bench-a Advocate Pu J. Malsawmzuala Vanchhawng ten India danpui chungchanga mipuite hriattur pawimawh tak tak an sawi dawn a ni.

<><><>

GOVERNMENT TABLES ONE NATION, ONE ELECTION BILL IN LOK SABHA

Vawiin khan Lok Sabha-ah ram chhunga inthlan lian a ruala buatsaihna tur One Nation One Election Bill chu chhawpchhuah a ni.

Union Law Minister Arjun Ram Meghwal-a'n House-a 'Constitution (One Hundred and Twenty Ninth Amendment) Bill 2024' leh 'The Union Territories Laws (Amendment) Bill 2024' chhawpchhuah tura a rawn sawihawn chu eptu lamten vote la ngeia thuthlukna siam an rawt a. Bill chhawpchhuah duh lamah vote 269 a tla a, a duh lo lamah vote 198 a tla a ni.

Eptu party – Congress, TMC, Samajwadi Party, DMK, Shiv Sena (UBT), CPI (M) leh a dangten bill-te chu India danpui ruangam beihna a ni tiin an dodal a. Joint Parliamentary Committee-in a lo zir chian leh phawt tura an hnena hlan an phut a ni.

Bill puluttu Arjun Ram Meghwal-a chuan eptu lamin India danpui ruangam beihna anga an sawi chu a hnawlsak a. Amaherawhchu, bill-te hi Joint Parliamentary Committee (JPC)-a hlan turin a rawt zui ve leh a ni.

<><><>